

Odluka kojom se proglašava Zakon o prestanku važenja Zakona o osiguranju depozita u Federaciji Bosne i Hercegovine

Koristeći se ovlaštenjima koja su Visokom predstavniku data u članu V Aneksa 10. (Sporazum o implementaciji civilnog dijela Mirovnog ugovora) Općeg okvirnog sporazuma za mir u Bosni i Hercegovini, prema kojem je Visoki predstavnik konačni autoritet u zemlji u pogledu tumačenja gore navedenog Sporazuma o implementaciji civilnog dijela Mirovnog ugovora; i posebno uzevši u obzir član II 1. (d) istog Sporazuma prema kojem Visoki predstavnik "pomaže, kada Visoki predstavnik to ocijeni neophodnim, u rješavanju svih problema koji se pojave u vezi sa implementacijom civilnog dijela Mirovnog ugovora";

Pozivajući se na stav XI.2 Zaključaka Konferencije za implementaciju mira održane u Bonu 9. i 10. decembra 1997. godine, u kojem je Vijeće za implementaciju mira pozdravilo namjeru Visokog predstavnika da iskoristi svoj konačni autoritet u zemlji u vezi sa tumačenjem Sporazuma o implementaciji civilnog dijela Mirovnog ugovora, kako bi pomogao u iznalaženju rješenja za navedne probleme "donošenjem obavezujućih odluka, kada to ocijeni neophodnim", o određenim pitanjima, uključujući i (prema tački (c) stava XI.2) "mjere kojima se osigurava implementacija Mirovnog sporazuma na cijelom području Bosne i Hercegovine i njenih entiteta";

Uzimajući u obzir da se Zakonom o osiguranju depozita u bankama Bosne i Hercegovine ("Službeni glasnik Bosne i Hercegovine", br. 20/02) predviđa da će agencije za osiguranje

depozita u entitetima prestati s poslovanjem u skladu sa određenim entitetskim propisima u roku od 60 dana od dana stupanja na snagu Zakona o osiguranju depozita u bankama Bosne i Hercegovine;

Konstatirajući da je Nacrt Zakona Federacije o prestanku važenja Zakona o osiguranju depozita usvojen na Domu naroda 1. oktobra 2002. godine, ali da nije usvojen na Zastupničkom domu zbog nedostatka kvoruma 25. septembra 2002. godine;

Imajući vidu da je ukidanje entitetskih agencija za osiguranje depozita neophodno kako bi one prestale s radom i izvršile zvanični prenos svih prava, obaveza i sredstava na državnu agenciju, te da bi se ukidanje entitetskih agencija za osiguranje depozita trebalo odvijati istovremeno;

Imajući na umu sva prethodno navedena pitanja, Visoki predstavnik ovim donosi sljedeću

ODLUKU

KOJOM SE PROGLAŠAVA ZAKON O PRESTANKU VAŽENJA ZAKONA O OSIGURANJU DEPOZITA U FEDERACIJI BOSNE I HERCEGOVINE

Zakon koji slijedi i koji predstavlja sastavni dio ove Odluke stupa na snagu odmah u skladu sa članom 4 istog, na privremenom osnovu dok ga ne usvoji Parlament Federacije Bosne i Hercegovine u istom obliku, bez izmjena i dopuna i bez dodatnih uvjeta. Ova Odluka takođe stupa na snagu odmah i objavljuje se odmah u "Službenom glasniku Bosne i Hercegovine" i "Službenim novinama Federacije Bosne i Hercegovine".

Sarajevo, 22. oktobar 2002.

Paddy Ashdown
Visoki predstavnik

ZAKON

PRESTANKU VAŽENJA ZAKONA O OSIGURANJU DEPOZITA U FEDERACIJI BOSNE I HERCEGOVINE

Član 1.

Ovim zakonom uređuje se prestanak važenja Zakona o osiguranju depozita ("Službene novine Federacije BiH", br. 41/98, 13/00, 29/00) i prestanak rada Agencije za osiguranje depozita Federacije Bosne i Hercegovine (u daljem tekstu: Agencija za osiguranje depozita).

Član 2.

Zakon o osiguranju depozita prestaje važiti danom stupanja na snagu ovog zakona.

Član 3.

Agencija za osiguranje depozita u bankama Bosne i Hercegovine (u daljem tekstu: Agencija) je pravni sljednik Agencije za osiguranje depozita. Sredstva, prava, obaveze i zaposleno osoblje Agencije za osiguranje depozita prenose se na Agenciju.

Član 4.

Ovaj zakon stupa na snagu odmah i objavljuje se u "Službenom glasniku Bosne i Hercegovine" i "Službenim novinama Federacije Bosne i Hercegovine".